

NESTRI SIGNÔR JESÙ CRIST
RE DAL MONT INTÍR

Solenitât

Antifone di jentrade Ap 5,12; 1,6

L'Agnel che al è stât copât al merte di vê
potence e richece, sapience e fuarce e onôr:
a lui la glorie e la potence tai secui dai secui.

Si dîs Glorie a Diu.

Colete

Diu onipotent e eterni,
che tu âs volût tornâ a fâ dutis lis robis
in Crist, to Fi, Re dal mont intîr,
danus la gracie
che dute la creazion, sfrancjade de sclavitût,
e servissi la tô maiestât e ti laudi cence mai finî.
Pal nestri Signôr Jesù Crist to Fi, che al è Diu
e cun te al vîf e al regne dutune cul Spirtu Sant,
par ducj i secui dai secui.

PRIME LETURE 2 Sam 5,1-3

A onzerin David re di Israel.

Dal secont libri di Samuel

In chei dîs, dutis lis tribûs di Israel si presentarin di David a Ebron e i diserin: «Cjale mo: nô o sin part dai tiei vues e de tô ejar. Timp indaûr, cuant che Saul al regnave sore di nô, tu jeris tu che tu menavis fûr e dentri Israel, e il Signôr ti à dit: Tu tu passarâs il gno popul Israel e tu deventarâs sorestant di Israel». Ducj i anzians di Israel a lerin dongje di David a Ebron e il re David al fasè un pat cun lôr a Ebron presince dal Signôr, e lôr a onzerin David re di Israel.

Peraule di Diu.

SALM RESPONSORIÂL dal Salm 121

R. E regne la pâs là che al regne il Signôr.

Ce ligrie cuant che mi àn dite:

«O larin te cjase dal Signôr».

I nestris pîts bielzà si cjatin,
Jerusalem, dentri des tôs puartis! **R.**

Jerusalem che e je stade fate
come une citât ben vuaiade.

Là sù lis tribûs a levin,
lis tribûs dal Signôr,
seont la leç che Israel al à vude
di laudâ là sù il non dal Signôr. **R.**

Là sù a son prontadis lis sentis de justizie,
lis sentis de cjase di David.

Bramait la pâs a Jerusalem:
chei che ti vuelin ben che a vedin furtune! **R.**

SECONDE LETURE Col 1,12-20

Nus à trasferîts tal ream dal so cjâr Fi.

De letare di san Pauli apuestul ai Colossêns
Fradis, ringraciùn cun gjonde il Pari che nus à metûts
in stât di partecipâ al destin dai sants inte lûs.
Lui nus à gjavâts fûr
de paronance dal scûr
e nus à trasferîts
tal ream dal so cjâr Fi,
che in lui o vin la redenzie,
il perdon dai pecjâts.
Lui al è il litrat dal Diu invisibil,
il Fi primarûl di dute la creazion,
parcè che in lui
a son stadis creadis dutis lis robis
tai cîi e su la tiere,
chêz visibilis e chêz invisibilis:
Tronus, Dominazions,
Principâts e Potencis.
Dutis lis robis a son stadis creadis
midiant di lui e par lui;
e lui al esist prin di ducj lôr
e ducj a stan sù in lui.
Lui al è ancje il cjâf dal cuarp, ven a stâi de Glesie;
lui al è il principi, il Fi primarûl
dai risussitâts,
in mût di jessi il prin in dut,
parcè che in lui e à vût gust
di stâ dute la plenece
e di riconciliâsi, midiant di lui, dutis lis robis
de tiere e dal cil, fasint la pâs
midiant dal sanc de sô crôs.
Peraule di Diu.

CJANT AL VANZELI cf. Mc 11,10

R. Aleluia, aleluia.

Benedet chel che al ven tal non dal Signôr!

Benedet il so ream che al sta rivant.

R. Aleluia.

VANZELI Lc 23,35-43

Signôr, impensiti di me cuant che tu vignarâs tal to ream.

Dal vanzeli seont Luche

In chê volte, il popul al stave a cjalâ. I sorestantz dal popul invezit a svilanavin Jesù disint: «Al à salvât chei altris, che si salvi sè se al è il Crist di Diu, l'elet». Ancje i soldâts lu svilanavin; i levin dongje par dâi asêt e i disevin: «Se tu sêss il re dai Judeus, salviti!». Parsore dal so cjâf e jere ancje une scrite: Chel chi al è il re dai Judeus.

Un dai delincuents che a jerin stâts metûts in crôs lu ofindeve: «No sêstu tu il Crist? Salviti te e ancje nô!». Ma chel altri lu corezeve: «No âstu propit nissun timôr di Diu, tu che tu stâs paiant la stesse condane? Par nô e je juste, parcè che o cjapìn la pene mertade cu lis nestris azions, ma lui invezit nol à fat nuie di mâl». Po al zontà: «Jesù, impensiti di me cuant che tu vignarâs tal to ream». Jesù i rispuindè: «Tal dîs in veretât: vuê tu sarâs cun me in paradîs».

Peraule dal Signôr.

Si dîs O crôt.

Su lis ufiertis

Ti ufrin, Signôr, la vitime che e à riconciliât la gjernazie umane
e o prein cun umiltât che to Fi
ur dedi a ducj i popui i regâi de unitât e de pâs.
Lui che al vîf e al regne tai secui dai secui.

Prefazi: Crist re dal mont intîr.

V. Il Signôr cun vualtris.
R. E ancie cun te.

V. Adalt i cûrs.
R. Ju vin viers il Signôr.

V. Vin agrât al Signôr nestri Diu.
R. Al è just e sacrisant.

Al è propit just e sacrisant, al covente e al da salvece
vêti agrât simpri e dapardut,
Signôr, Pari sant, Diu onipotent e eterni:

Tu cun vueli di gjonde tu âs consacrât
Predi par simpri e Re dal mont intîr
il to Fi Unigenit,
Jesù Crist nestri Signôr.
Lui, sacrificantsi sul altâr de crôs
tant che vitime imacolade di pâs,
al à operât il misteri de redenzion umane,
e, daspò di vê metudis sot de sô paronance dutis lis creaturis,
i à ufiert a la tô maiestât infinide
il so ream eterni e universâl:
ream di veretât e di vite,
ream di santitât e di gracie,
ream di justizie, di amôr e di pâs.

Par chel, cui Agnui e cui Arcagnui,
cui Tronus e cu lis Dominazions,
e cun dute la sdrume de schirie dal cîl,
o din sù la cjante de tô glorie,
disint cence polse:

Sant, Sant, Sant al è il Signôr Diu di dut il mont...

Antifone a la comunio Sal 28,10-11

Si è sentât il Signôr re par simpri:
al benedissarà il so popul cu la pâs.

Daspò de comunio

Daspò di vê spartît il pan de imortalitat,
ti prein, Signôr,
di tignîsi in bon di ubidî ai comandaments di Crist, Re dal mont intîr,
par podê vivi par simpri cun lui tal ream dal cîl.

Lui che al vîf e al regne tai secui dai secui.